

Inatsisartut suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

- 1. Sisimiuni Saviminilerinermik ilinniarfimmik nutaamik sananissamik pilersaarut Naalakkersuisut sulii attappaat?**
 - a) Ilassutissartaa qanoq angitigissava?**
- 2. Pilersaarut sulii attanneqarsimappat pilersaaruserneq maannamut sumut killippa?**
 - a) Pilersaarutit naammassinissaanut piffissalersuutit qanoq isikkoqarpat?**
 - b) Qanoq annertutigisumik nutaamik sanaartortoqassava?**
 - c) Ilinniartut inissaat pilersaarutini aammalu aningaasalersornissaat ilanngunneqarpat?**
 - d) Qaqugu siunnersortinut suliariumannittussarsiuunneqassava?**
- 3. Pilersaarut sulii attanneqarsimappat, sanaartornerup qaqugu aallartissinnaanissaa Naalakkersuisut naatsorsuutigaat?**
- 4. Naalakkersuisut qanoq isumaqarfigivaat Sisimiuni Sanaartornermik Ilinniarsiup nutaamik allilerneqarneratigut Issittumi sanaartornermut qaffasissumik ilinniarsiup pilersitsiviginissaanut (Arctic Technical University School/College)?**
- 5. Sanaartornissap aningaasalersornissaanut aningaasat pisariaqartinneqartut qanoq isikkoqassagunarpat?**

(Inatsisartuni ilaasortaq Erik Jensen, Siumut)

Tunngavilersuut:

Ukiuni arlalinni Naalakkersuinikkut aaliangiiniaaluusaartarnerit malitsigisaannik ilinniartoqarfiit arlallit aserfallallutillu oqoqalersimapput. Taamaattumik Naalakkersuisut siuliisa ilinniartoqarfinni arlalinni nutaanik ineqarfinnik (kollegiat) annertuumik sanaartortitsipput. Taamatuttaaq aamma Saviminilerinermut ilinniarfia kiisalu najugaqarfia Nuummiittup aserfallalluinnarsimasup nutaamik taarserlugu Sisimiuni assassornernut tunngasut ataatsimoortilernissaat tunngavigalugu, tassa sanaartorneqarnissaa siunertaralugu Naalakkersuisut 2024-imi maajimi tunngaviumik aaliangiisumik aaliangiussaqaqsimanerat naqissuserneqarluni. Tamannalu suliniut 2030-imi piareerluni naammassinneqarnissaa pilersaarutaalluni.

Tamatumallu suliniutit pitsaasup sulii pilersaarutaanersoq aammalu Naalakkersuisunngortuniit sulii attanneqarnerneq apeqqutigerusuppara. Sulisut aammalu ilinniartut pitsaasumik

avatangiiseqarnissaat toqqissisimasumillu ersarissumik siunissaq pillugu paasitinneqarnissaat
pingaartuummat minnerunngitsumillu sinnerissami ilinniarfiit inerisarnissaat aamma
pingaartuummat apeqqutinik ersarissaassutaasussanik kissaateqarpunga.

Kissaatigaara apeqquteqaatikka ullut suliffiusut 10 ingerlanerani akineqassasut.